

La campagne

Il projet de Arlef par sensibilizâ gjenitôrs e nonos sui vantaçs dal fevelâ par furlan ai plui piçui

«Cui che al sa il furlan, al sa di plui», al è il messaç de gnove campagne di comunicazion

integrade de ARLeF, la Agenziej regional pe lenghe furlane, mandade fûr in chestis setemanis sei su cjarte stampade, sei su tv, radio e web. L'intindiment dal projet al è chel di fâ cressi la cussience che la lenghe furlane e sedi une risorse impuartante pe educazion linguistich. In particolâr, al è stât fat un spot video, intitulât "Cudumars", dât in man ae simpatie e ae fuarce comunicative de atore **Catine (Caterina Tomasulo)**, par evidenziâ che fevelâ par furlan ai propriis fis e nevôts, fin di piçui, ur regale un prezios bagai di vantaçs cognitifs, culturâi e sociâi. "Cudumars" al viôt in sene, biel che a son a taule, mame e pai che a tabain tra di lôr par furlan, inveceit cui fis lu fasin par talian. Mame e pai a volaressin fâ mangjâ al piçul Fabio i cudumars che lui al à tal plat. Al è in chest moment che e jentre in sene une ninine Catine in miniature... Di chel moment i gjenitôrs no cencenaran plui tal indreçâsi anje ai fis in marilenghe. **Catine, jê e je la protagoniste dal spot. Cuant che e je stade svicinade de ARLeF, ce aie pensât?**

«Intant o soi stade pardabon contente de propueste e o ai di di che no i àn metût tant par convincimi. Tai miei spetaçui o dis di tancj agns incà che imparâ il furlan al è vierzi la ment, al jude a capî chei altris e che e je une lenghe

Catine: «Fevelait furlan ai vuestris fruts, simpri»

che e va insegnade ai fruts».

Il spot al marche che fevelâ par furlan in cjase al è une risorse e l'invit a gjenitôrs e nonos al è chel di fevelâ par furlan ai fruts...

«E je propit une tindince: adults che tra di lôr a tabain par furlan e che po a passin al talian tal dialic cui fis. Cence visâsi che inveceit i piçui a son cetant ricetifs e fevelâur par furlan al vûl di lassâur un patrimoni culturâl unic».

Tal video jê e je une vore vore piçule... nus contie la experience?

«Daûr di 30 seconds di video a son tantis oris di lavôr e tantis personis che si son impegnadis. O cjapi la ocasion par ringraziâlis dutis lôr. Jo mi soi divertide un grum, anje parçè che lis senis a van provadis e tornadis a provâ tantis voltis, po al ven sielzût il passaç ideâl. O ai di di che la Arlef e à vût une bieie idee par cheste campagne».

Fabio però nol vûl savèndi di chei cudumars...

«Di chest o pensi jo, che o rivi in sene in veste di stria e jessint fûr de pignate o dis ai gjenitôrs che a son "cudumars" e che forsit al è miôr provâ a indreçâsi al fi par furlan. E la robe e funzione... parçè che in ultin Fabio al mangje i cudumars».

Catine, jê e je une furlane in maniere diferente, cemût che i plâs autodefinisi. Nus contie la sô storie?

«O soi rivade culi 29 agns indaûr de Basilicade e mi soi cjatade cussì ben che plui che integrade dal Friûl mi 'ndi soi inamorate. Lavorant intun bar, o ai imparât une lenghe che tal principi mi someave criptade e o

soi diventade une lucane testimonial de lenghe furlane. Chel che o dis al pues someâ umoristic, ma di fat al conferme l'amôr tra dôs regions un pôc dismenteadis: Basilicade e Friûl che tal gno cûr si son metudis adun».

La lenghe, si scuën dilu, jê le cognôs pardabon ben...

«Se intant che tu lavoris tal bar ti fevelin par furlan di matine a sere, tal ultin la lenghe ti jentre. Jo mi soi cjatade a cognossile cuasi cence che mi inacuazès. Par me e je une lenghe straordenarie».

Cualis sono stadis lis primis peraulis che i son "jentradis"?

«"Bon bon", "po ben", "po ben bon" e "tai" che in Basilicade no si sa ce che al sedi, si pense a une discipline orientâl... E po "mandi" che se tu rivis dal sud tu ti domandis ce mai che tu varâs di "mandâ". A son peraulis che ti atrain, anje parçè che a somein dut altri rispjet dal lôr significât...».

Tal rest de Italie nô furlans o sin cognossûts come un popul che nol da masse confidence. Cemût aial vivût jê chest aspjet?

«Un pôc al è vèr, ma jo o ai podût cognossi il popul furlan. O vès daûr une storie travaiaide, tormentade, che al ven di domandâsi cemût che o sedis ancjemò ca. Vie pai secui o vès passât di dut e duncje e je difidence inviers di cui che al rive, par vie che il forest al à simpri rapresentât invasions, submissions. Ma se al capis che al pues fidâsi di te, alore il furlan ti darà il cûr...».

Jê e gjestive un bar, cumò e fâs la atore a timp plen. Un cambi di vite...

«Prime o fasevi la bariste e il teatri



La simpatie di Catine te gnove campagne di comunicazion integrade de ARLeF

al jere il gno hobby, cumò lis cjossis si son scambiadis e il bar al è la mê passion parçè che al è un lûc che ti pues pardabon insegnâ cemût che al è il mont... O torni dispès tal Bar Marinelli di Tarcint a saludâ i clients e cumò che mi àn viodude un pôc dapardut, in graciis di cheste campagne promoziônâl, no pues permetimi di di "ciao" al puest di "mandi" parçè che se no mi corezi daurman...».

Cuâl isal il so plat preferit?

«Il frico, cence dubi: mi soi subit inamorate. Pecjât che cuant che i agns a van indevant, si scuën mangjâ di mancul e stâ atents aes caloris... Dut cês il frico al reste il gno amôr a prin viodi».

Cualis sono lis peraulis furlanis che i plasin di plui?

«...al è difcil sielzi. Ma "snait", di indefinit savôr anglosasson, e je une piçule peraule che e ten dentri une serie di cualitâts che, par esempi, un al à di vè se al vûl lavorâ intun bar (e rit, ndr.), ma e vûl di anje rapiditât di pinsîr,

velocitât, capî la situazion che si à devant. E po mi plâs "cumbinìn" parçè che e cjape dentri une filosofie di vite. Tal rest de Italie "si fa", in Friûl "si cumbine, o di rif o di raf"...

Catine, si svicine il 25 di Novembar, Zornade internazionâl pe eliminazion de violence su lis feminis. Al è un teme che jê, tai siei spetaçui, e rive a frontâ cun ironie...

«Ciertis robis, anje argoments tragjics, a van frontadis pûr cun umorisim. Ai 24 di Novembar o sarai a Maian cun Tiziano Cossetini e il spetaçul "Lui e lei, universi paralleli" ("Lui e jê, univiers paralèi") che al tocje il teme de violence su lis feminis, un alc che no si rive a eliminâ. O cirin di dâ il nestri contribût, sigûrs che tal mont di violence 'nd è tante anje par vie che la int no rive plui a rilassâ l'anim, ma se forsit si rit di plui a saran mancul soferencis...».

Monika Pascolo e Valentina Pagani

lis Gnovis

■ UDIN. Messe par furlan

A Udin, la Messe par furlan e ven ciantade sabide ai 18 di Novembar aes 5 e mieze soresere, li de capele «de Purità», daprûf dal domo (cun Radio Spazio che le trasmet sul moment). Al compagnarà la celebrazion "Rose di mil" di Montenârs. Al disarà messe pre G. Gabassi.

■ SEDEAN. Comun "riciclon" premiât di Legambiente

A Sedean a san fâ la netisie miôr di ducj, e anje sparagnant, cussì che il Comun al à vût, tai dis passâts, la bieie gnove di un premi talian tant che comun "riciclone". In doi agns, a Sedean, si è passâts di une produzion di 93 chilos par cjâf dal 2020 ai 45 dal 2022, cul Comun che in graciis dal gnûf mût di raciei i scartums, al è rivât anje a ridusi i coscj e a puartâ benefici al ambient. La introduzion di une "tarife puntuâl" e à il vantaç di fâ paia il cost di base dal servizi secont la cuantitât di scovacis e ai servizis che a vegnin dàts ai abitants. Il gnûf sisteme al à puartât a un sparagn dal 7% rispjet ai coscj dal 2020. Insome, tal pais di Turoldo ducj a àn fat il lôr dovê e Legambiente ju à premiâts; un biel esempi par chei che ur puce stâ a pierdi timp par diseparâ come cu va lis scovacis, inveceit di fândi di dut un grum.

Miercus 15 S. Albert il Grant v.

Joibe 16 S.te Margarite de Scozje

Vinars 17 S.te Elisabete de O.

Sabide 18 D. de Basiliche vaticane

Domenie 19 XXXII I Domenie vie pal an

Lunis 20 S.te Irene martare

Martars 21 Presentazion de Vergjine

Il timp Frêt



Il soreli
Ai 15 al jeve aes 7.07
e al va a mont aes 16.36.



La lune
Ai 20 Prin cuart.

Il proverbi
A San Martin ogni most al è vin.

Lis voris dal mès
Si sierin – pocj plantis a la volte – cu la grisiole o cul carton lidric di Trevis, indivie, scarole e cicorie a sparç.

Tradizions furlanis dal mès par cure di Mario Martinis

PROVERBIS DAL MÈS

Diesim prin mès dal calendari, novembar al registre, a voltis, l'ultin clip dal autun (Istadele di Sant Martin) ma dal sigûr i prins frêts, tant che lis fiestis dal stes Sant Martin (11-XI) e po chês dabon plui decisivis di Sante Catarine (25-XI) e di Sant Dree (30-XI) a son tignudis "puartis dal unvier". A rivin ploiis condurantis, umit e fumatis in planure, brumis intes valadis di mont e cualchi anje la prime nêf su lis culinis, intant che il soreli al continue a sbassâsi e cussì lis zornadis si scurtin simpri di plui a pro di gnots simpri plui lungjis, fredis e fondis. Aromai la nature e pant il so cediment: i ramaçs si dispuein e lis fueis coladis par tiere a tachin a disfâsi, i vid-içons e lis lidris parsore tiere a muerin, i ultins uciei a emigrin e i animâi a van tes covis. Finidis dutis lis voris agriculis, une volte, a novembar al tacave il timp des veglis che al lave indevant par dut l'unvier. Mês des gnespulis, dai prins cacos e dai miluçs ingranâts, te societât contadine di une volte a la fin di novembar al tacave il timp just par copâ il purcit, che al dave la riserve di cjar a ogni famee par dut l'unvier.

- Novembar di buere, ucei inte voliere
- Novembar di fumate, bon timp al lasse
- A novembar si alce la fumate e i lasse il puest ae glace
- Novembar ploiôs cjamp frutuôs, novembar glaçât mandi semenât
- I Muarts (2-XI) o che a justin o che a disjustin (il timp)
- A Sant Martin (11-XI) ogni most al divente vin
- A Sant Martin, il gran al va a mulin
- Ocjis, cjastinis e vin a son plats di Sant Martin
- A Stât di Sant Martin, tre dis e un frechenin
- A Sant Clement (23-XI) si finis di meti la siale e il forment
- Sante Catarine (25-XI), la nêf su la culine
- Sante Catarine, il frêt par ogni aine
- Sante Catarine e mene il frêt cu la caretine
- A Sante Catarine si met sù la tabarine
- Cui che al vûl la ocje fine, le compri a Sante Catarine
- Di Sante Catarine a Nadâl, un mès biel avuâl
- A Sant Andree (30-XI) il purcit su la bree